




ՀՈԳԵՎՈՐ ԾԵՄԱՐԱՆԻ ՆՈՐ ՈՒՍՈՒՄՆԱԿԱՆ ՏԱՐԵՇՐՋԱՆԻ ԲԱՅՈՒՄԸ

Սույն թվականի սեպտեմբերի 9-ին, շաբաթ օրը, առավոտյան ժամը 11-ին, հոգևոր ճեմարանի հանդիսությունների դահլիճում տեղի ունեցավ ճեմարանի 1989—1990 ուսումնական տարեշրջանի բացման հանդիսությունը՝ նախագահությամբ Վեհափառ Հայրապետի:

Հանդիսությանը ներկա էին Մայր Աթոռի Գերագույն Հոգևոր Խորհրդի ատենապետ գերաշնորհ Տ. Սիոն արքեպս. Մանուկյանը, Մայր տաճարի լուսարարապետ Տ. Հուսիկ արքեպս. Սանթրուրյանը, Մայր Աթոռի միաբանությունը, հոգևոր ճեմարանի դասախոսական կազմը, ուսանողությունը, Մայրավանքի պաշտոնեությունը և այլ հյուրեր:

Հանդիսությանը ներկա էին նաև Հայկական ԽՍՀ Միևիստրների խորհրդին առընթեր Հայ Եկեղեցու գործերի խորհրդի նախագահ տիար Ա. Վարդանյանն ու տեղակալ Ռ. Զարգարյանը:

Հանդիսությունն սկսվեց Տերունական աղոթքով, որից հետո հնչեց Հայաստանի պետական հիմնը: Այնուհետև ճեմարանի սաները խանդավառությամբ երգեցին «Ճեմարանի քայերգը»: Քայերգից հետո ճեմարանի երգչախումբը կատարեց Արևելցու «Որք զարդարեցին» ու Ծնորհալի Հայրապետի «Այսօր Երկնայինքն» և «Ցաղթող և զնոր օրհնութիւն» շարականները:

Բուրվառակրի ու մոմակիրների ուղեկցությամբ, Ավետարանը ձեռքին, հանդիսությունների դահլիճ մտավ Տ. Սեպուհ արք. Զուլջյանը և ընթերցեց Սերմնացանի առակը (Մատթ. ԺԳ 4—9):

Ավետարանի ընթերցումից հետո ճեմարանի երգչախումբը կատարեց «Էջ Միածինն ի Հօրէ» շարականը:

Ուսումնական տարվա վերաբացման առթիվ նախորդ ուսումնական տարվա ձեռքբերումների ու նոր ակնկալիքների մասին խոսքով հանդես եկավ հոգևոր ճեմարանի տեսուչ Տ. Եզնիկ քին. Պետրոսյանը:

Այնուհետև ճեմարանի դասախոսական կազմին ու ուսանողությանն ուղղված իր օրհնության ու բարի մաղթանքների խոսքը հղեց Վեհափառ Հայրապետը: Նորին Սրբությունն իր խոսքում անդրադարձավ երկրաշարժից հետո հայ ժողովրդի ներկա վիճակին՝ գոհունակությամբ նշելով ճեմարանի դասախոսական կազմի և ուսանողության քերած նպաստը աղետյալների ոգնելու հարցում, ապա, անդրադառնալով վերջին տարիներին սկիզբ առած կրոնական-եկեղեցական վերազարթոնքին, նշեց. «Անցած տարվա ընթացքում մենք 12 եկեղեցիներ ենք բացել Հայաստանի տարբեր շրջաններում, Արցախում, Լեռնագրադում և այլն: Իսկ մոտ ապագային ևս 15 եկեղե-

ցիներ պիտի վերաբացվեն: Ընձեռված հնարավորությունները ավելացնում են մեր պարտականությունները, նոր պարտականություններ են դնում մեր ուսերին»: Այնուհետև Վեհափառ Հայրապետը շեշտեց, որ այսուհետև ոչ միայն անհրաժեշտ են ծիսակատար քահանաներ, այլև այնպիսի հոգևորականներ, որոնք կարողանան բավարարել իր հայացքը դեպի Եկեղեցի դարձրած մեր ժողովրդի հոգևոր պահանջներն ու ակնկալիքները: «Ս. Էջմիածնի հոգևոր ճեմարանի յուրաքանչյուր ուսանող

այս գիտակցությամբ պիտի պատրաստվի իր ապագա հոգևոր առաքելությանը», ընդգծեց Վեհափառ Հայրապետը:

*
* *

Հոգևոր ճեմարանի 1989—1990 նոր ուսումնական տարվա բացման հանդիսությունը ավարտվեց խմբովին երգված «Հայր մեր»-ով և Նորին Սրբության «Պահպանիչ»-ով:

